



Notat

Frå:

Jan Erik Boge

Informasjon om vedtak etter hastemynde gjort 23.08.2021 i formannskapssak 041/2021, samt informasjon om mindretalsanke på vedtaket

Saknr/Journalnr

19/427/21/7048//JEB

Arkivkode

FE-030

Dato:

26.08.2021

I formannskapsmøtet 23.08.2021 vart det gjort vedtak om innføring av stopp i tilsetjingar i sentraladministrasjonen fram til mellombels rådmann har overteke for noverande rådmann.

Vedtaket var som følgjer:

«Samnanger kommune meiner det er uheldig at avtroppande rådmann har høve til å tilsettja konsulent for leiargruppa berre kort tid før ho sluttar, og at dette i verste fall kan ha negativ innverknad på kvaliteten i styringa av kommunen. Det er òg eit viktig moment at dette gjev ny rådmann mindre rom til å byggja opp administrasjonen slik han/ho ønskjer.

Samnanger kommune innfører difor stopp i tilsetjingar i sentraladministrasjonen med verknad frå tidspunktet dette vedtaket er gjort. Denne tilsetjingsstoppen gjeld fram til mellombels rådmann har overteke for noverande rådmann. Mellombels rådmann vurderer om prosessen med tilsetjing av konsulent for leiargruppa skal halda fram.

Sidan den nemnde tilsetjinga av konsulent kan skje innan kort til (søknadsfristen er gått ut) er det formannskapet som gjer dette vedtaket med heimel i Reglement for kommunestyret, formannskapet, naturutvalet og kontrollutvalet i Samnanger kommune, pkt. 3.4.2 Fullmakt – hastesaker, jf. kommuneloven § 11-8. Kommunestyret vil få melding om vedtaket ved første høve.»

Som vedlegg til dette notatet følgjer utdrag frå utkast til møteprotokoll for formannskapet 23.08.2021, med informasjon om formannskapet si handsaming av sak 041/2021.

Om vedtak etter hasteparagrafen i kommunelova

Som det går fram av vedtaksteksten, vart vedtaket gjort med heimel i den såkalla hasteparagrafen i kommunelova (§ 11-8), jf. reglar i kommunalt reglement i Samnanger. Kommunestyret har i reglementet gitt formannskapet fullmakt til å treffa vedtak i saker som normalt skulle ha vore avgjort av kommunestyret, i dei høve når det er turvande å treffa vedtak så raskt at det ikkje er tid til å innkalla kommunestyret.

Det går fram av § 11-8 i kommunelova at melding om eit vedtak som er truffe etter hasteparagrafen, skal leggast fram i det neste møtet i det organet som normalt skulle avgjort saka (kommunestyret).

Mindretalsanke/krav om handsaming i kommunestyret

Umiddelbart etter at vedtaket vart gjort i formannskapet 23.08.2021, sette tre av medlemmene i formannskapet fram såkalla mindretalsanke. Det vil seie at dei sette fram krav om at saka skal avgjerast av kommunestyret. Ordninga med mindretalsanke er heimla i punkt 3.6 i kommunen sitt delegeringsreglement:

3.6 Mindretalsanke

I saker der eit folkevald organ har fått delegert avgjerdsrett frå kommunestyret, kan tre medlemmer, ordføraren eller rådmannen krevja saka lagt fram for kommunestyret. Krav må setjast fram i same møte som vedtaket er gjort, og kravet skal protokollførast.

Det har etter formannskapsmøtet 23.08.2021 vorte stilt spørsmål ved om det er høve til å fremja mindretalsanke når formannskapet gjer vedtak etter hasteparagrafen i kommunelova. Denne problemstillinga er ikkje omtalt/avklart verken i kommunelova eller i kommunen sitt reglement.

Ordføraren har i samband med utsendinga av møteinnkallinga til kommunestyremøtet 02.09.2021 meldt frå om at saka ikkje er sett på saklista for kommunestyret og at kommunestyret 02.09.2021 sjølv må avgjera om saka skal på saklista ved godkjenning av innkalling og sakliste.

Om rådmannen sitt personalansvar og mynde i tilsetjingssaker

Det kan i samband med formannskapet sitt vedtak 23.08.2021 også vera behov for å sjå på kva reglar som gjeld for rådmannen sitt personalansvar og mynde i tilsetjingssaker, og om/i kva grad folkevalde organ kan "overstyra" rådmannen i slike saker. Det var i 2020 ei sak i Sirdal kommune, der fylkesmannen i Agder gjennomførte lovlegkontroll av nokre punkt i kommunestyret sitt budsjett-/økonomiplanvedtak som gjaldt rådmannen sitt mynde knytt til tilsetjingar. Informasjon om fylkesmannen si avgjerd i den saka kan lesast på følgjande lenke:

- <https://www.sirdalmedia.no/2020/03/radmann-vant-lovlighetskontroll/>

Vedlegg:

Utdrag frå utkast til møteprotokoll for formannskapet 23.09.2021 - sak 041-2021